

30.september

Uunga siunnersuut: Kalaallit Nunaanni sullivinni avatangiisit pillugit inatsisip allangortinneqarneranik aamma Kalaallit Nunaanni sulisilluni ajoqusersinnaanermut isumannaarineq pillugu inatsisissatut siunnersuut pillugu Namminersornerullutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

2009-mi aatsitassanut inatsisaasoq katersuuffigineqarluni akuerineqarpoq, 2010-mi aatsitassanut oqartussaaffik nunatsinnit tiguneqarpoq, taamaammat pisussaaffilerpugut oqartussaaffiit pillugit suleqatigiiffiusumik nunat tamalaat akornanni isumaqatigiissutaasut qiviallattaallugit alloriaqqinnissatsinnut.

Inatsisissatut allannguutissatut siunnersuutigineqarpoq pingaartumik nunatsinni suliniutit angisuunik aatsitassarsiornermik erngullu nukinganik suliniutinut sullifinni avatangiisinut nakkutilliinerup isumannaatsumik ingerlanneqarsinnaanerata malitsigisaanni inatsisitigut tunngaveqartumik ingerlatsisinnaanissaq.

Siumumiit pingaartitaraarput sullivinni avatangiisinut nakkutilliinerup aatsitassarsiornermik erngullu nukingani suliffeqarfiit sulisunut isumannaatsumik ingerlatsinerat tamatigut qularnaarneqarsimassasoq, taamaammat inatsisassatut siunnersuummi, oqartussaaffik suli angerlaassimanngisatta danskit oqartussaaffigisaat, nunatsinni sulisunut isumannaatsumik sulisoqarneranik nakkutilliinerup inatsisitigut naleqqussaaniikkut ingerlanneqassasoq siunnersuutigineqarmat iluarisimaarparput.

Ilisimaarivarput suliffeqarfinni inuussutissarsiuteqarfiusuni tamaginni ajutoornerit pisinnaasartut, taamaattumik nakkutilliinerit pinaveersaartitsinerup pisinnaatitaaffinnillu imaqartarmata illersorlugit Sullivinni nakkutilliinerit inatsisitigut toqqammavilerlugit ingerlanneqarnissaat qulakkerneqarsimasariaqarmata.

Siumumiit iluarisimaarparput siunnersuummi pineqartuni sulisut suliffinni aarlerinartumik pisoqarataasappat sulisuusup illersorneqarnera pingaarnertullugu pisinnaatitaaffiit malillugit suliffimminik qimatsisinnaanerata taarsiiffigitinnissamik pisinnaatitaaffilerlugit ingerlanneqarsinnaalissammata.

Maluginiagassaavoq tusarniaanermi akissutigineqartuni inatsisip naleqqussaavigineqarluni allangortinneqarnissaanik siunnersuut aningaasalersuinerup imaqartoq iluarisimaarneqarmat.

Politikkimi sulinerup pingaaruteqarpoq sillimaniarnerit sakkortuut sutigut tamatigut atuutinneqassasut, tamannalu sinaakkutit isumannaatsut aqqutigalugit ingerlanneqassasut.

Taamaammat Siumumiit ataatsimut isigalugit sinaakkutit allannguutissatut siunnersuutigineqartut ilalerlugit, siunnersuutip aappassaaneerqannginnerani Inuussutissarsiornermut, Suliffeqarnermullu ataatsimiititaliamut innersuupparput.

Suka K.Frederiksen

Siumut